

明史稿

明史稿

明史藁

列傳第六十七

敕編撰

光祿大夫經筵講官明史總裁戶部尚書加七級臣王鴻緒奉

劉宇

曹元

劉璣

才寬

文貴

甯杲

張子麟

李鏊

汪鏌

張瓚

史道

胡守中

呂本

吳鵬歐陽必進

許論

楊順

劉宇字志大鈞州人成化八年進士授上海知縣入為御史坐事謫施秉知縣歷瑞州知府累遷山東按察使匿情市交人不覺其險詐弘治中以大學士劉健薦擢右僉都御史巡

撫大同名爲左副都御史正德改元吏部尚書馬文升薦之
進右都御史總督宣府大同山西軍務字初撫大同私市善
馬賂權要兵部尚書劉大夏因孝宗召見語及之帝密遣錦
衣百戶邵琪往察字厚賂琪爲之抵諱後大夏再召對言用
人行政宜召執政面議帝曰健薦字才堪大用以朕觀之此
小人豈可用哉由是知內閣亦未可盡信也字聞以大夏不
爲已地深憾之及劉瑾用事字介焦芳以結瑾二年正月入
爲左都御史瑾好摧折臺諫字緣其意請救箝制御史有小
過輒加笞辱瑾以爲賢瑾初通賄望不過數百金字首以萬
金贄瑾大喜曰劉先生何厚我尋轉兵部尚書加太子太傅
瑾遣官核各邊糧儲邊吏多得重禍字在大同耗蠹尤多獨

得免子仁應殿試求一甲不得厚賄瑾內批授庶吉士踰年
遷編修時許進爲吏部尚書字讒於瑾遂代其位而曹元代
字爲兵部字在兵部時賄賂狼籍及爲吏部權歸逸郎張綵
而文吏贈遺又不若武弁嘗愷愷歎曰兵部自佳何必吏部
也後瑾欲用綵代字乃令字以原官兼文淵閣大學士字宴
瑾閣中極驩大喜過望明日將入閣辦事瑾面詰之曰爾真
欲相邪此地豈可再入字不得已乃乞省墓去踰年瑾誅科
道交章劾奏削官致仕子仁黜爲民字附瑾時無大惡然怒
御史王時中幾致之死瑾害劉大夏潘蕃字與焦芳共成之
元字以貞大寧前衛人柔佞滑稽不修士行舉成化十一年
進士授工部主事歷員外郎郎中與劉瑾有連自瑾侍武宗

東宮卽與相結正德二年屢遷右副都御史巡撫甘肅分守中官張昭奉命捕虎豹元以軍士出境搜捕恐啓邊釁上疏請止不從改撫陝西踰年召爲兵部右侍郎轉左尋代宇爲尚書兼督團營加太子少保將校遷除皆惟瑾命元所入亦不貲五年拜吏部尚書兼文淵閣大學士入閣輔政元瑣瑣無能在閣中日飲酒諧謔道里巷鄙語而已瑾敗元卽日上疏請罪詞極哀詔許致仕言官交劾黜爲民元治甲第京師每從瑾所出意氣得甚及敗所藏違禁服物乘夜焚之病中自作墓志歎曰我死誰銘我者遂卒元無子當劉瑾時廷臣黨附者甚衆瑾誅言官交劾內閣則焦芳劉宇曹元尚書則吏部張綏戶部劉璣兵部王敞刑部劉璟工部畢亨南京戶

部張潔禮部朱恩刑部劉纓工部李善侍郎則吏部柴昇李
瀚前戶部韓福禮部李遜學兵部陸完陳震刑部張子麟工
部崔巖夏昂胡諒南京禮部常麟工部張志淳都察院則副
都御史楊綸僉都御史蕭遜巡撫則順天劉聰應天魏訥宣
府楊武保定徐以貞大同張禴淮揚屈直兩廣林廷選操江
王彥奇前總督文貴馬炳然大理寺則卿張綸少卿董恬丞
蔡中孚張禴通政司則通政吳鉞王雲鳳參議張龍太常則
少卿楊廷儀劉介尚寶則卿吳世忠丞屈銓府尹則陳良器
府丞則石祿翰林則侍讀焦黃中修撰康海編修劉仁檢討
段炅吏部郎則王九思王納誨給事中則李憲段豸御史則
薛鳳鳴朱袞秦昂宇文鍾崔哲李紀周琳其他郎署監司又

十餘人於是綵論死福謫戍元恩震聰訥武恬介黃中海仁
憲鳳鳴鍾除名亨昂閒住善巖諒志淳綸直彥奇良器哲致
仕選以貞禴中孚龍祿銓炅身袞紀琳九思納誨謫外朝署
爲清

劉璣字用齊陝西咸寧人成化十七年進士除曲沃知縣縣
產棗民有罪令入棗贖積數萬斛歲饑賑粟不給發棗繼之
徵授戶部主事進員外郎擢瑞州知府嘗禦賊爲所得慷慨
諭以禍福賊進酒酣飲臥帳中賊大信服送璣還其黨遂解
散歷知九江衡州正德二年雍王祐檣薨內官黃中護喪璣
供具宿辦中歎爲能稱之劉瑾瑾以其同鄉也喜召爲太僕
少卿明年春遷太常卿踰月進戶部右侍郎其秋遂代顧佐

爲尚書去知府時方一歲璣治績可稱爲瑾所用聲譽頓衰
瑾以邊鎮糧料不中程盡逮巡撫及管糧諸臣三十年以上
皆追論破產者數十家商人輸糧各邊久候未得直者瑾悉
停給商不復至邊用大窘遣官覈諸邊屯田增田多者蒙賞
少卽重罰諸邊騷然發價市糴於近邊州縣俾運入鎮城車
牛夫役追呼徧里閭四民盡失其業璣悉奉行無敢忤然璣
自以屈節中官居常鬱鬱日飲酒放廢邸舍無過從者或以
玉帶餽劉宇悞達璣所聞者怪問之其人驚去張綵代宇爲
尚書開門納賂車馬闐咽璣恬漠自如然公卿謁瑾率不得
見惟璣與綵至卽入飲閣中綵出揚揚公卿間璣俛首從其
後忸怩而已瑾敗人頗憐之因其自劾俾致仕去家居二十

餘年縑袍脫粟鄉人愛信焉與璣同以外僚遷尚書者寧夏胡汝礪麗水俞俊華亭朱恩隴州李善竝成化時進士其驟遷略如璣其廉皆弗如汝礪知大同府鎮守中官不檢下汝礪繩之中官怒汝礪卽移疾求去吏部惜其才固留之由是益發舒敢任事劉瑾疾文士懦緩樂用豪健吏汝礪亦以同鄉故求進正德二年召爲順天府丞明年由戶部左侍郎兼僉都御史董宣府屯田事尋改兵部銜劾奏英國公張懋等侵占民田二千餘頃瑾以還之民且定令勲臣不得置莊田喜汝礪稱指五年二月召拜兵部尚書未上卒俊歷官山西左布政使正德元年坐貪殘被論按治無跡獲免時瑾猶未熾俊訶知必柄國預結之瑾喜明年春召爲順天府尹四年

累遷至南京工部尚書明年請告歸光瑾卒恩累官河南左布政使諂事焦芳劉宇以達於瑾正德三年召爲南京右副都御史領操江事踰二年至南京禮部尚書瑾敗除名善歷兩京御史四川布政使正德三年瑾以鄉人故引之擢南京右副都御史再遷代俞俊爲工部尚書踰兩月瑾誅劾罷

才寬字汝栗遷安人成化十四年進士累官西安知府闊達不羈好長夜飲吏事亦不廢歷河南左布政使正德二年以右副都御史巡撫甘肅督副將白琮等敗寇明水湖賜救獎勞沙州屬番相讐殺數擾邊守臣屢招之不聽寬遣百戶董傑往犒其長且卜苦等聽命還沙州寬增俸一秩傑進二官移撫陝西拜刑部左侍郎未任調兵部劉瑾喜其才四年擢

工部尚書居數月代楊一清總制陝西三邊軍務寬輕率喜野戰閱一清營陣圖笑曰邊兵驍勇賊來驅使戰何營陣爲又好用權術倚瑾自恣御下寡恩參將閻綱游擊陳善都指揮郭邈竝有名寬惡其擊寇不力褫衣冠被以婦人服俾周行營中諸將憤莫肯効命其冬寇入花馬池寬令總兵官曹雄副將楊英等自興武營出擊而親率輕騎百餘踵之頗有斬獲寇伏兵突自沙窩山流矢中寬墜馬死事聞贈太子少保諡襄愍錄一子錦衣百戶寬故以才進死於敵人或愍之時有文貴者廣寧人成化中進士爲御史弘治末累官右副都御史巡撫延綏正德元年劉瑾用事召爲兵部侍郎二年春寇牧近邊廷議設總督命貴兼副都御史總宣府大同延

綏三鎮軍禦之比至寇已退諸邊墩臺築土爲之堅與石等
貴撫延綏架木其中斃之以篋作牕四周以施箭砲自定邊
營逮黃甫川延亘千里爲新臺百四十七璽書褒賚至是遂
欲盡易宣大墩臺請人貲補軍官及生員入監僧道給牒助
修築費且貸京帑銀四十萬兩先輸數萬於瑾第所請無不
從其後寇至縱火焚臺木燬篋墮軍士觸燄箭砲竟無所施
是時陝西督餉侍郎馮清奏改西安延安慶陽諸府芻糧皆
徵銀輸邊諸邊先改中鹽粟爲輸直凶歲已苦糴貴賴近地
濟之清改折議行官吏易侵牟而邊地益艱糴與貴改墩臺
俱爲邊人指怨云貴遷右都御史巡撫大同劉瑾以事怒貴
罷歸瑾誅言官交劾以致仕不問久之起撫鄖陽未幾改甘

肅世宗立落職歸

甯杲遼東海州人舉進士授行人弘治末選御史爲人狡佞
諂劉瑾驟擢大理左寺丞使江北復命後期瑾惡之謫潛山
知縣尋復以爲御史正德四年秋瑾以四方盜起建議設四
鎮捕盜御史使挈家赴官期盡賊乃返杲真定廣平柳尚義
順天保定薛鳳鳴江北潘銳江南四人皆無行而杲鳳鳴尤
甚鳳鳴至宿州與指揮石璽挾妓演武塲投壺蹴鞠爲樂瑾
知之謫爲徐州弓手杲素果驚懸賞格立什伍連坐法募驍
勇者自將之頗有捕獲每得賊輒盛軍容鳴金鼓驅之入城
屠其腸斷手足分懸四門文安大盜張茂招亡命劉宸劉寵
齊彥名輩又結中官張忠爲兄得潛入禁闈杲率壯士數十

人直入茂家捕得之對衆剖噉其心而去事聞瑾益才果而
是時尚義亦數有斬獲五年春遂擢果左僉都御史尚義右
僉都御史仍專捕盜然果特張皇立威欲以脅散諸賊實寡
幹略惟與尚義多殺良民充首功而已旣而尚義逐賊經果
地果不助又功已報者復列上爲兵部所發已又爲給事御
史段豸涂敬所糾降副使領捕盜事其秋瑾鄉人修撰康海
奔喪過內丘盜劫其貲瑾聞責捕甚急海詭言劫者瑾所寄
橐也有司懼急斂民財償海事得稍解果以勘遲留再降山
西參議瑾敗罷歸七年流賊劉宸等橫中原果尚義賄權勢
取中旨起故官而復自以有罪請下廷議吏兵部不敢爭請
仍以副使討賊帝不從竟命爲僉都御史未幾果代彭澤巡

撫保定諸府盜過阜城交河發兵追不及遂掠殺二縣民百六十餘至景州殺耕者數十死者家泣訴於紀功給事中以聞劾者數十章率爲權倖所庇杲笑曰積疏盈車其奈我何其冬賊已盡平給事中潘埏等復劾之乃召杲還已而埏及郎中唐澤勘上具如劾章時杲已遭喪去釋弗問十四年復寅緣起巡撫宣府言官交章爭之不報杲至驟請帑金數十萬足邊儲戶部難之兵部請大臣一人蒞其事乃報可杲在鎮二年乾沒無算半入諸近倖家世宗卽位言官交劾乃下獄論死杲稱病丐免左都御史金獻民持不可帝弗納竟戍雷州尚義巴陵人進士歷參政大計罷歸

張子麟藁城人成化二十年進士除南京大理評事正德初

累官刑部左侍郎劉瑾誅言官劾其黨附帝不問七年進尚書子麟性柔輒無特操頗通諸嬖佞與時浮沈錦衣卒閔三法司道上大理司務林華評事沈光大先後執杖之其帥朱寧奏二人擅撻駕前人下之詔獄卒益無忌遇事直上部堂呼子麟輩老尊長子麟輩降顏接之寧有親王汪爲錦衣千戶殺人子麟不敢攝員外郎劉秉監據衆証具獄子麟畏寧屬他司官脫注獄其軌法多此類踰十年再加至太子太保世宗立省親歸猶虛位待之已因其請許致仕初伍文定破南昌從宸濠所得一啓署云刑部尚書臣張子麟謹封持示巡撫王守仁巡按伍希儒二人屏不奏嘉靖二年御史張鉞按江西發其事詔下守仁等問狀守仁等具奏如鉞言但啓